

ac *Sal. nigricans*, (Wahlenb. Fl. L. et Sv.); quia et in descriptione dicitur: "*folia sub incauta exsiccatione omnino nigrescunt*," et mox: "*ramuli tenelli et rachides, petiolique semper pubescunt*." Quo nihil a *Sal. majali*, arbuscula, ceterisque huc pertinentibus formis, potest esse alienius.

§. 16.

Plurima de variationibus salicum essent animadvertenda, eaque memoriâ digna, quæ tamen temporis locique angustia hic prætermittere coactus, in aliud tempus opportunum, vel speciale opusculum, si velint fata, reservare satius duxi. Nunc hoc unum adjungam, dispositionem *Salicum*, e germinum foliorumve vestitu desumptam, parum consentaneam esse naturæ, quod et affinitatis vinculum rumpitur, et species sæpe cum varietatibus commutantur. Neque methodus illa, quæ amentis nititur, satis apta, quia, ut supra dixi, nimis vaga atque incerta. Nam et casus incidunt et tempora, quibus amenta præcocia fiunt serotina, aut foliacea nuda. Nulli denique characteres fidi, nisi qui ex pedicellis germinum sumuntur, respectu habito nectarii atque styli *m*).

m) Meritissimus Koch. in supra laudata commentatione, quum in characteribus *Salicum* recensendis, de amentis agit pag. 5. inter alia